

PARS SECUNDA
DE
PERTINENTIBUS AD
JUDICIUM.
INFORMATIO PRIMA

De Propositione.

ARTICULUS PRIMUS

De Naturâ Propositionis.

CONCLUSIO I. Essentialis definitio Propositionis est, quod sit *Oratio enuncians unum de alio.*

Explicatur: *Oratio* ponitur pro genere, cæteræ particulæ pro differentiâ, definitio enim & divisio nihil enunciant, quia carent copulâ. Discursus vero unum quidem infert *ex alio*, scilicet consequens ex antecedente, non tamen unum enunciat *de alio*, ratione sui, sed ratione propositionum, quibus constat. Quod illa definitio sit *essentialis*, patet, quia enunciare unum de alio est essentia propositionis, & ei priùs convenit, quam significare verum vel falso.

Advertendum autem, quo Enunciare

unum de alio dupliciter intelligi possit, Imò, pro affirmatione vel negatione prædicati de subjecto, & sic enunciare convenit propositioni categoricæ, z dò, pro iudicio de connexione vel non connexione partium, qualescunque illæ sint, sive termini, sive propositiones, & hoc modo enunciare etiam convenit propositioni hypotheticæ.

- 3 CONCLUSIO II.** Definitio descriptiva Propositionis est, quod sit oratio verum vel falsum significans.

Explicatur: *Oratio iterum ponitur pro genere, verum vel falsum significans pro differentia, significare verum est significare rem ut in se est, ut: nix est alba, significare falsum est significare rem aliter ac in se est, us: nix est nigra, unde natum est axioma: ab eo, quod res est, vel non est, propositio dicitur vera vel falsa.* Hanc definitionem esse descriptivam, manifestum est, quia datur per proprietates.

- 4** Dices Imò. Secunda definitio propositionis convenit alteri à definito, ergo non est bona. P. ant. alterum à definito est definitio, sed secunda definitio propositionis etiam convenit definitioni, ergo. P. min. *animal rationale*, quæ est definitio hominis, etiam est oratio verum significans, ergo. Deinde, hæc vox: verum significat

veritatem, & tamen non est propositio,
ergo.

R. ad prob. min. dist. ant. animal rationale est oratio verum significans apprehensivè, C. significans judicativè N. ant. definitio quidem significat verum apprehensivè, quia est actus simplicis apprehensionis explicans naturam rei sicut est, non tamen significat verum judicativè, quia non exigit copulam ad explicandam rei naturam.

Ad additum R. vox *verum* significat veritatem signatè. C. ant. exercitè N. ant.

Dices 2dò. Illa definitio non est bona, quæ traditur per opposita, sed secunda definitio propositionis traditur per opposita, ergo, Maj. patet, definitio enim debet explicare naturam rei, opposita autem eidem rei convenire non possunt, P. min. secunda definitio propositionis datur per verum & falsum, sed verum & falsum sunt opposita, ergo.

R. dist Maj. illa definitio non est bona, quæ traditur per opposita, copulativè sumpta C. Maj. per opposita divisivè sumpta N. Maj. sed secunda definitio propositionis datur per opposita divisivè sumpta C. min. per opposita copulativè sumpta N. min. proposi-

tio non definitur oratio verum & falsum significans, sed verum vel falsum, ita ut propositio in communi & signate sumpta sit indifferens, an sit vera vel falsa, propositio autem in particulari, & exercitè sumpta (ceteris paribus) alia sit determinatè vera, alia determinatè falsa.

ARTICULUS SECUNDUS

De Divisionibus Propositionis.

6 IN propositione quatuor potissimum occurunt consideranda, Primo *substantia*, quæ apud S. Thom. op. 48. de enunc. c. 6. est unio partium, 2dò *Materia*, vel *remota* & sunt termini, vel *proxima*, & est convenientia vel *disconvenientia* terminorum, antecedens ipsam unionem, 3tò. *Qualitas*, quæ est affirmatio vel negatio, 4tò. *Quantitas*, quæ est extensio subjecti ad plura vel pauciora. Secundùm hæc quatuor etiam propositione quadrifariam dividitur.

7 CONCLUSIO I. Propositione secundum *Substantiam* dividitur in *Categoricam*, & *Hypotheticam*.

Declaratur. Propositione *Categorica* vel *simplex* est, quæ constat *subjecto* & *predicato*, *velut partibus principalibus unica copula principali*, ac *verbali unitis*, ut: *virtus est laudanda*.

Pro-

Propositio Hypothetica vel composita est, quæ constat duabus propositionibus categoricis velut partibus principalibus unione adverbiali unitis, ut : si sol lucet, dies est. Dupliciter ergo distinguitur propositio categorica ab hypothetica, Primo, ex parte extremorum, quia extrema propositionis categoricæ immediata sunt termini, extrema propositionis hypotheticæ immediata sunt propositiones. 2dò ex parte copule, quia copula in propositione categoricâ est verbalis, in hypotheticâ adverbialis.

Dices. Omnis propositio est composita, 8 ergo non datur propositio simplex vel categorica, P. ant. omnis propositio componitur ex subjecto, & prædicato, mediante copula, ergo.

R. dist, ant. omnis propositio est composita vel categoricè, vel hypotheticè C ant. omnis propositio est composita hypotheticè N. ant. Propositio categorica est composta categoricè, sive ex terminis. Propositio hypothetica est composita hypotheticè, sive ex propositionibus. Circa propositionem categoricam.

Advertendum primò. Quid propositio 9 adhuc maneat simplex, licet subjectum vel prædicatum sit oratio, aut integra proposicio, unde hæ propositiones sunt categoricæ:

Imperator Romanorum est defensor Ecclesie. Homo, qui est deditus inertiae, est laude indignus. Petrus studet, est propositio.

IO 2do. Quod copula verbalis, sive expressa per verbum *sum*, sit duplex, alia Principalis vel Connexionis, alia minus principalis, vel implicationis, Copula *principalis* est illa, quæ unit vel connectit prædicatum subjecto, & vocatur *principalis*, quia penes illam principaliter attenditur, an propositio sit affirmativa vel negativa, vera vel falsa. Copula *minus principalis* est illa, quæ non unit prædicatum subjecto, sed potius se tenet ex parte unius extremi tantum, & hinc dicitur copula *implicationis*, v. g. in hac propositione: *Petrus, quia est Logicus, est diligens*, pro copula *principalis* habetur ly: *est*, positum ante ly *diligens*, pro copula vero *minus principalis*, accipitur ly *est*, positum post relatum. Signum copulæ *minus principalis* est, si illâ omissâ stet adhuc propositio, sic in dato exemplo manet eadem propositio, licet dicas. *Petrus logicus est diligens.*

II 3to. Propositio categorica dicitur de secundo adjacentे, quando prædicatum propositionis ponitur implicitè, ut: *Petrus currit*. Dicitur de tertio adjacentे, quando subjectum, prædicatum, & quando ponuntur explicitè, ut: *Petrus est Doctus*. Dicitur

de verbo adjectivo . quando solum verbum ponitur , ut : *vesperascit*.

CONCLUSIO II. *Propositio secundam* 12
Materiam (proximam) 3plex est , alia est in materiâ *necessariâ* , alia in materiâ *impossibili* , & alia in materiâ *contingente*.

Declaratur. *Propositio in materiâ necessariâ vel naturali est* , cuius prædicatum *necessariò convenit subjecto* , ut : *homo est animal*.

Propositio in materiâ impossibili est , cuius prædicatum *absolutè repugnat subjecto* , ut : *homo est lapis*.

Propositio in materiâ contingente est , cuius prædicatum *contingenter vel accidentaliter convenit subjecto* , ut : *homo est albus*.
ubi.

Advertendum 1mò. *Quod manente eodem subiecto & prædicato , semper maneat eadem materia propositionis* , licet ipsa propositio mutetur penes affirmationem vel negationem , veritatem vel falsitatem , universalitatem vel particularitatem , unde , sive dicas : *homo est animal* , sive : *homo non est animal* , utraque propositio est in materiâ *necessariâ*.

2. Aliud est : propositionem esse *necessariam* , & aliud : esse in materiâ *necessariâ*. *Propositio necessaria est necessariò vera* , li-

cet termini non habeant convenientiam necessariam. Propositio in materiâ necessariâ est, in quâ termini habent necessariam convenientiam, unde hæc propositio : *homo non est animal*, est in materiâ necessariâ, non tamen est propositio necessaria, vel necessariò vera, sed impossibilis. Eodem modo discurrendum est de propositione *impossibili* & in materiâ *impossibili*. Propositio impossibilis est *impossibiliter vera*. Propositio in materiâ impossibili est, in quâ termini invicem absolute repugnant, unde hæc propositio : *homo non est lapis*, est propositio necessaria, sed in materiâ impossibili. Ex quibus :

15 Sequitur 1mò, quod ad cognoscendum, in quâ materiâ sit propositio, unicè attendenda sit terminorum habitudo, id est, vel conexio vel repugnantia.

Sequitur 2dò, quod omnis propositio affirmativa in materiâ necessariâ sit etiam necessaria, & vera, ut : *homo est animal*, omnis verò propositio negativa in materiâ necessariâ, sit impossibilis, & falsa, ut : *homo non est animal*.

Sequitur 3tiò, quod omnis propositio affirmativa in materia impossibili sit etiam impossibilis, & falsa, ut : *homo est lapis*, omnis verò propositio negativa, in materia impossibili sit necessaria & vera, ut : *homo non est lapis*.

Se-

Sequitur 4:ò, quod omnis propositio tam affirmativa, quam negativa in materia contingente semper sit, & maneat contingens, ut: *homo est Doctus*.

CONCLUSIO III. Propositio secundum Qualitatem dividitur in **Affirmativam.** & **Negativam.**

Declaratur. Propositio affirmativa est, cuius copula NB. principalis caret negatione, ut: *justitia est virtus.* Propositio negativa est cuius copula principalis affecta est negatione, vel formaliter, ut: *audacia non est virtus*, vel equivalenter, ut: *nullum vitium est virtus.*

Dictum est, cuius copula NB. principalis. &c. Quia negatio apposita copulae minus principali, non facit propositionem negativam, unde hæc est propositio affirmativa: *Petrus, qui non est doctus, est piger.* Præterea

Advertendum primò, si particula: *non*, neganter sumpta sèpius repetatur in propositione, tenenda est regula illa: *paritas negationem affirmat, imparitas negat*, id est, si negationes sint pares, propositio est affirmativa. Si negationes sint impares, propositio est negativa.

2do. Ad cognoscendum. An propositio affirmativa sit; an negativa, non est attendendum ad ly *non*, cadens supra terminos, eosque infinitans, sed tantum ad negationem immemorandum.

diate antepositam vel signis logicis , vel copulae , unde haec propositione : nullus homo est animal , est affirmativa , hic vero . Non nullus homo non est animal , est negativa , V. infra dicta dicenda de *Æquipollentia* .

19 3to. Nomina negativa , ut : *impius* , *indocilus* , & similia , non faciunt propositionem negativam , licet enim haec duæ propositiones : *Petrus est impius* , & *Petrus non est pius* , convenienter quoad rem & materialiter , differunt tamen formaliter , & penes modum enunciandi .

20 4to. Si in aliqua propositione adest duplex copula verbalis principalis , ut : *Petrus est* , & *non fuit doctus* , tunc illa propositione dicenda est virtualiter duplex , ideoque ad discernendam affirmationem vel negationem resolvi debet in duas categoricas , dicendo : *Petrus est Doctus* , & *Petrus non fuit doctus* , & tum facilime discernitur , quod prima categorica sit affirmativa , secunda vero sit negativa .

21 CONCLUSIO IV. Propositio secundum Quantitatatem dividitur in *Universalem* , *Particularem* , *Singularem* , & *Indefinitam* .

Declaratur : Propositio Universalis est , cuius termino communi præponitur signum *universale* , vel affirmativum , quale est :

omnis ,

omnis, vel negativum, quale est: *nullus*, v. g. *Omnis homo est risibilis*, *nullus homo est in-*
trabilis.

Propositio Particularis est, cuius termino, alias *communi*, præponitur signum particu-
lare, vel affirmativum, ut: *quidam*, *aliquis*,
vel negativum, ut: *quidam non*, *aliquis non*,
v. g. *Aliquis homo est justus*, *aliquis homo non*
est justus.

Propositio Singularis est, cuius termino, alias *communi*, præponitur pronomen de-
monstrativum, ut: *hic homo est doctus*. Ad
propositionem singularem reducitur illa,
quæ pro subjecto habet terminum singula-
rem determinatum, ut: *Aristoteles est Philo-*
sophus.

Propositio Indefinita est, cuius termino
communi nullum præponitur signum, ut: *ar-*
bore est fæcunda.

Advertendum imò. Quid ad cognoscen- 22
dam quantitatem propositionis attenden-
dum sit *solum subjectum*, ita ut propositio sit
universalis, si subjectum sit affectum signo
universalis, licet prædicatum affiliatur signo
particulari v. g. *Omnis homo est aliquid ani-*
mal, similiter hæc propositio: *Franciscus est*
omnis homo, est singulatis, licet prædicatum
sit affectum signo universalis.

2dō. Si in aliquâ propositione sint duo diver- 23

la signa, eaque ambo in recto, ut : *omnis homo*, & *aliquis homo est animal*, propositio dicenda est virtualiter, duplex, & resolvenda hoc modo : *omnis homo est animal*, & *aliquis homo est animal*, quarum 1ma est universalis, 2da particularis. Si vero unum signum sit in recto, aliud in obliquo, tunc quantitas propositionis sumi debet penes signum in recto positum, unde hæc propositio est universalis : *Omnis sensus alicujus hominis sunt perturbati.*

24 3tiò. Circa propositionem indefinitam observanda sunt hæc axiomata Dialecticorum.

1. *Propositio Indefinita affirmativa in materia necessaria æquivalet universalis*, sic hæc propositio : *homo est animal*, æquivalet huic universalis : *omnis homo est animal*. Intelligenda est hæc regula de propositionibus directis, quia in indirectis non tenet, hæc enim propositio : *animal est homo*, non æquivalet universalis, sed particulari : *aliquid animal est homo*.

2. *Propositio Indefinita negativa in materia impossibili æquivalet universalis*, sic hæc propositio : *homo non est lapis*, æquivalet huic : *nullus homo est lapis*.

3. *Propositio Indefinita, que est de fide, æquivalet universalis*, sic hæc propositio : *homo*

homo moriens in gratiâ salvabitur, æquivalet huic: omnis homo moriens in gratiâ salvabitur.

4. Propositiones doctrinales (quæ velut principia vel conclusiones traduntur ab aliquâ scientiâ) æquivalent universalibus, tale est illud Medicum : *vulnus circulare est difficile curatu, id est, omne vulnus circulare, &c.* Item illud Theologicum : *fur est obligatus ad restituendum, id est, omnis fur, &c.* & illud Juridicum : *homo gravis furti reus est suspendendus, id est, omnis homo gravis furti reus, &c.*

5. Propositio Indefinita in materiâ continente æquivalet particulari, sic hæc propositio : *homo est albus, æquivalet huic: aliquis homo est albus.*

Colliges ex dictis, quomodo respondeas interrogatus de propositione. Imò, si quæratur, *que est propositio?* Resp. Categorica, vel Hypothetica, Quatis? est affirmativa, vel negativa. Quanta est universalis, particularis, singularis, vel indefinita.

Quæres. Nunquid supersint utiles aliæ divisiones propositionis?

R. Superlunt sequentes, quas juvat breviter annotari.

Imo dividitur in *Identicam & Formalem,*

Pro-

Propositio Identica est, in quâ prædicatum est omnino idem cum subiecto, ut : *gladius est ensis.* Propositio Formalis est, cujus prædicatum vel realiter vel saltem ratione distinguitur à subiecto, ut : *homo est animal.*

- 27 2dō dividitur in Directam & Indirectam, Propositio Directa est, in quâ superius prædicatur de inferiore, ut : *homo est animal.* Propositio indirecta est, in quâ inferius prædicatur de superiore, ut : *animal est homo.*
- 28 3tiō dividitur in Absolutam, & Modalem, Propositio Absoluta est, quæ aliquid absolute & sine addito enunciat, ut : *homo est rationalis*, Propositio Modalis est, quæ prædicatum enunciat de subiecto sub certo modo modificantे ipsam unionem extreborum, ut : *homo necessariō est rationalis*, tales particulæ modificantes sunt quatuor comprehensiblēs verbis :

Omnis Necesse vales, Impossibile Nullus,
Possibile Quidam, Quidam non Possibile non.
 id est, Necesse est modus universalis affirmativus, & æquivalet ly : *omnis. Impossibile,* est modus universalis negativus, & æquivalet ly : *nullus.* Possibile est modus particularis affirmativus, & æquivalet ly : *quidam,* vel aliquis. Possibile non, est modus particularis negativus, & æquivalet ly
qui-

quidam non, vel aliquis non. E quibus facile erit cognoscere, quantitatem, & qualitatem propositionum modalium.

Si petas. Unde sumatur veritas & falsitas propositionum modalium. 29

R^e. Desumi debet penes modum ; non penes dictum. Per modum intelligitur particula modalis. Per dictum intelliguntur cæteræ partes propositionis. Tunc ergo propositio modalis est vera, quando modus cum veritate convenit dicto , licet dictum sit falsum , v. g. hæc modalis : *hominem esse lapidem est impossibile* , est vera , licet dictum : *hominem esse lapidem* , sit falsum. Tunc autem Propositio modalis est falsa , quando modus cum veritate dicto non convenit , v. g. hæc modalis : *equum esse irrationalem est contingens* , est falsa , licet dictum : *equum esse irrationalem* , sit verum.

Advertendum insuper (quod s^ape in 30 Philosophiâ tangitur) Propositionem m^odalem aliam esse Compositam , quæ facit sensum compositum , aliam esse Divisam , quæ facit sensum divisum . Sensus Compositus tunc fit , quando significatur posse simul coexistere actum vel formam unius termini cum actu alterius , ut : *cœcum videre est possibile* , cuius sensus est ; potest conjungi actus visionis cum actuali cœcitate . Sensus divisus tunc fit , quando

quanto significatur , quod forma vel actus prædicati possit convenire subjecto , non tamen dum actu habet formam oppositam , & simul cum illâ , sed tantum successivè , ut : *cœcus possibiliter videt* , cuius sensus est , qui jam est cœcus , habet potentiam ad visionem , non tamen actu videbit , nisi recedente cœcitate . Spectato tamen communi modo loquendi , multum dependet ab intentione proferentis , an tales propositiones intelligendæ sint in sensu Composito ; an in Diviso .

Cætera de propositione modali plus habent obſcaritatis ; quam utilitatis , consultò prætermittenda .

3^r 4^{ro}. Propositio dividitur in Exceptivam , Exclusivam , & Reduplicativam , Propositio Exceptiva est , quæ continet particulam exceptivam : *præter* , ut : *omnes Apostoli sunt sancti præter Iudam* , id est , excepto Iudâ . Propositio Exclusiva est , quæ continet particulam exclusivam : *tantum* , vel *solum* , ut , *tantum fides Catholica est vera* , quam sic expones : *fides Catholica est vera* , & *nulla alia fides est vera* . Propositio Reduplicativa est , quæ continet particulam reduplicativam , *quatenus* , *in quantum* , vel *similem* , ut : *homo quatenus rationalis , est risibilis* . V. de Ampliat , à N. 51.

AR-

ARTICULUS TERTIUS

De Propositione Hypothetica

Sicut ad propositionem categoricam re-³².
quiritur copula *verbalis*, quæ est verbum
sum, sic ad propositionem Hypotheticam
(cujus definitio supra data est) requiritur
copula *adverbialis*, una scilicet ex his parti-
culis: *Et*, *Vel*, *Si*, *Ergo*, *Quia*, penes quas par-
ticulas etiam cognoscitur, quotuplex sit
propositio Hypothetica.

CONCLUSIO. Propositio Hypothe-³³.
tica dividitur in **Copulativam**, **Disjunctivam**,
Conditionalem, **Rationalem**, & **Causalem**.

Declaratur. Propositio Hypothetica Co-
pulativa est, cuius partes principales uniun-
tut conjunctione *Copulativa* v. g. *Plato docet*,
Et Aristoteles audit.

Disjunctiva est, cuius partes principales
uniuntur conjunctione *Disjunctiva*, v. g. *dies
est, VEL nox est*.

Conditionalis est, cuius partes principa-
les uniuntur conjunctione *Conditionali*, v. g.
SI sol lucet, dies est.

Rationalis est, cuius partes principales
uniuntur conjunctione *Rationali*, v. g. *Sol
ortus est, ERGO dies est*.

Causal is est, cuius partes principales uni-
untur conjunctione *Causali*, v. g. *QUIA sol
ortus est, dies est*.

34 Qdæres Imò. Quæ conditiones requiriatur ad veritatem vel falsitatem propositionis Hypotheticæ?

R. Imò. Ad veritatem propositionis Copulativæ requiritur, ut utraque categorica sit vera. Ad falsitatem verò sufficit, si una sit falsa. Unde vera est hæc copulativa: *Homo est rationalis, & brutum est irrationale, falsa est hæc: Homo est animal, & brutum est lapis.*

35] R. 2. Ad veritatem propositionis Disjunctivæ, una tantum categorica debet esse vera, secundum axiomam: *Propositio Disjunctiva est vera ratione alterutrius partis.* Ad falsitatem verò requiritur, ut utraq; sit falsa. Unde hæc disjunctiva vera est: *vel homo est rationalis, vel brutum est rationale, falsa est hæc: homo est latrabilis, vel brutum est risibile,* ubi

36 Advertendum, si propositio disjunctiva constet duabus categoricis, quarum utraq; est vera, v. g. *Justus salvatur, vel Impius damnatur*, tunc illa propositio in rigore Dialectico non est disjunctiva, sed potius copulativa.

37 R. 3tiò. Ad veritatem propositionis Conditionalis sufficit, quod secunda propositio deduci possit ex prima, licet utraque sit falsa. Ad falsitatem verò sufficit, secundam ex prima non deduci, unde vera est hæc conditionalis: *si canis haberet alas, volaret, falsa est hæc; si homo sit risibilis, est equus.*

R. 4. ad


R. 4tō. Ad veritatem propositionis ratio. 38
 nalis requiritur, ut prima sit vera. Deinde,
 ut secunda sequatur ex prima, ad falsitatem
 sufficit, unam ex his conditionibus deficere,
 unde vera est hæc rationalis: Petrus est homo,
 ergo est animal, falsæ vero sunt hæc: Petrus est
 equus, ergo est irrationalis, item, Petrus est Lo-
 gicus, ergo cantat.

R. 5tō. Ad veritatem propositionis causalis 39
 requiritur, ut prima propositio sit vera. De-
 inde, ut secunda sequatur ex prima. Demum,
 ut prædicatum primæ, sit causa prædicti se-
 cundæ propositionis. Ad falsitatem sufficit,
 si una ex his conditionibus desit. Unde vera
 est hæc causalis: quia homo est rationalis, est ri-
 sibilis, falsa autem est hæc: quia, homo est ri-
 sibilis, est rationalis, risibilitas enim non est
 causa rationalitatis, sed rationalitas risibili-
 tatis.

Quæres 2dō. Unde sumatur affirmatio 40
 vel negatio propositionis Hypotheticæ?

R. Sicut affirmatio vel negatio proposi-
 tionis Categoricæ sumenda est penes copu-
 lam verbalem, sic affirmatio vel negatio pro-
 positionis Hypotheticæ sumenda est penes
 copulam adverbialem, vel hypotheticam.
 Tunc igitur Hypothetica erit affirmativa,
 si ejus copula non habeat adjunctam particu-
 lam: non, unde hæc propositio; si sol non est

ortus, dies non est, est affirmativa, quia copulatio est affirmativa, licet partes sint negativæ. Tunc vero Hypothetica erit negativa, si ejus copula sit affecta negatione. Unde hæc est negativa: Non si Petrus mendicet, dives est, licet partes sint affirmativæ. Ut ergo propositio Hypothetica fiat negativa, commodè agetur (licet præter morem Grammaticorum) si à principio propositionis ponatur particula non. Rationalis tamen negativa fieri potest, si à principio ponas ly: non sequitur, v. g. non sequitur: Petrus est animal; ergo est rationalis.



INFORMATIO SECUNDA.

De Proprietatibus Terminorum intra Propositionem.

- i. **E**xplicatâ naturâ propositionis, principalibusque ipsius divisionibus, recto ordine doctrinæ nunc agendum est de proprietatibus ipsam propositionem consequentibus. Quædam autem proprietates sequuntur ipsa extrema, quædam totam propositionem. Proprietates sequentes ipsa extrema sunt sex: Suppositio, Ampliatio, Restrictio, Alienatio, Diminutio, Appellatio, de quibus agendum est in præsenti informatione.

AR.

ARTICULUS PRIMUS.

De natura Suppositionis.

CONCLUSIO. Suppositio est Acceptio ter-
mini pro aliquo, de quo verificatur, juxta exi-
gentiam copulae. Pro intelligentia definitionis.

Advertendum primò. Quod hæc duo
inter se differant: *Significare*, & *Supponi*.
Vox dicitur *significare*, dum ex institutione
hominum habet vim aliquid intellectui ma-
nifestandi. Dicitur verò *supponi*, dum ac-
cipitur vel usurpatur (modo statim expli-
cando) pro ipsâ re significatâ, cuius vicem
vox supplet, sicut tabulæ Cosmographicæ
usurpantur pro regionibus, per eas repræ-
tentatis.

2dò. Acceptio est duplex, alia *Activa*,
alia *Passiva*. Acceptio activa est *actus intellectus* rem hoc vel illo modo accipientis.
Acceptio passiva est ipse *usus passivus*, quo
terminus dicitur pro aliquo acceptus.

3tiò. Verificatio etiam duplex est, alia *Propositionis*, alia *acceptio*. Verificatio
propositionis est, quando res ita se habet,
sicut enunciatur, sive quando propositione est
vera, & hæc non exigitur ad suppositionem,
termini enim possunt etiam supponere in
propositione falsâ, ut: *Homo est lapis*. Ve-
rificatio acceptio est, quando res signifi-
cata

cata , pro quâ accipitur terminus , verè datur
juxta exigentiam copulæ . His observatis .

5 Explicatur definitio . Dicitur imò , Suppo-
sitione est acceptio (passiva) per quam particu-
lares conuenit suppositione cum aliis proprietati-
bus termini , in quarum definitionibus ly ac-
ceptio ponitur saltem implicitè . Cæteræ par-
ticulæ ponuntur pro differentiâ . Et

Dicitur 2dò . Pro aliquo , de quo verificatur .
Scilicet illa acceptio V . N . 4 .

Dicitur 3to . Juxta exigentiam copulæ . Id
est : res significata , pro quâ terminus usur-
patur , debet verè existere sub eâ differen-
tiâ temporis , quæ per copulam importa-
tur . Ubi

6 Adverte imò modum examinandi , an
vox aliqua supponat . Sit propositio : An-
tichristus erit impius , ut cognoscas , an in hac
propositione Antichristus supponat , assume
ly Antichristus , & claritatis gratiâ fac novam
propositionem , eamque demonstrativam ,
in qua pro subjecto pone pronomen demon-
strativum , hoc , pro prædicato pone ly Anti-
christus , & interpone copulam prioris pro-
positionis , dicendo : hoc erit Antichristus , &
quia vides hanc propositionem esse veram ,
& Antichtistum verè exiturum , secundùm
exigentiam copulæ , quæ importat tempus
futurum , inde colligis in prima propositione :

Anti-

Antichristus erit impius, ly: *Antichristus verè supponere*. Econtra in hac propositione: *Antichristus est crudelis*, non potes cum veritate dicere: *Hoc est Antichristus*, falsum enim est, quod *Antichristus de præsenti existat*, & hinc colligis, quod subjectum in hac propositione: *Antichristus est crudelis*, non supponat, ideoque dicitur propositio de subjecto non supponente.

2dò. Quod hæc regula teneat in propositionibus contingentibus, si enim propositio sit in materia necessaria, in qua verbum abstrahit ab omni tempore, tunc etiam terminus supponit, licet res per eum significata non existat sub differentia temporis per copulam importati, v.g. in hac propositione, *Adam est homo*, ly *Adam* verè supponit, quamvis *Adam* de præsenti non existat, unde non potest, quidem *quoad sensum* designari: *Hoc est Adam*, potest tamen designari *quoad intellectum*, cum intelligamus independenter à tempore esse necessariam connexionem inter Adamum & hominem.

Dubitabis. An suppositio detur extra 8, propositionem?

R. N. Ratio est, quia suppositio debet defundi penes copulam, extra propositionem verò copula non datur.

Dices, Extra propositionem datur termi 9

nus, ergo etiam suppositio P. coa., ubi datur *essentia termini*, etiam dari debet *proprietas termini*, sed suppositio est *proprietas termini*, ergo si &c.

R. ad prob. coæ D. mai. Ubi datur *essentia termini*, etiam debet dari *proprietas absoluta C. mai.* proprietas *respectiva N. maj.* sed suppositio est *proprietas termini absoluta N. min.* proprietas *respectiva C. min.* Suppositio est *proprietas termini tantum respectiva, & connotans statum actualis compositionis*, unde convenit solis terminis *actu componentibus.*

ARTICULUS SECUNDUS.

De Divisionibus Suppositionis.

10 **C**ONCLUSIO I. Suppositio in communidividitur in *Materialem & Formalem.* Declaratur. Suppositio materialis est *acceptio termini pro se ipso*, id est, pro nudâ voce. ut: *Homo est nomen.* Hæc tamen non est propriè suppositio, sicut vox materialiter accepta non est propriè terminus.

Suppositio Formalis est *acceptio termini pro re*, ad quam significandam est impositus, ut: *Homo est animal.*

II. Regulae cognoscendi, quod terminus supponat materialiter, sunt sequentes.

Prima: Si sit vox nihil significans.

2do: Si vox significativa penes se vel explicitè vel implicitè habeat notas materialitatis, quales sunt: *nomen*, *vox*, *particula* &c. v. g. *Homo est dissyllabum*.

3ta. Si prædicatum non conveniat rei significatæ per subiectum, sed soli voci, ut *Petrus est nomen*.

CONCLUSIO II. Suppositio Formalis **12** dividitur in Propriam & Impropiam.

Declaratur. Suppositio Propria est acceptio termini pro eo, quod propriè significat, ut: *homoridet*, ubi participium *ridens* implicitè positum accipitur propriè.

Suppositio improppria est acceptio termini pro eo quod impropriè significat, ut: *pratarident*.

CONCLUSIO III. Suppositio Propria **13** dividitur in Simplicem, & Personalem sive realem.

Declaratur. Suppositio simplex est acceptio termini tantum pro suo primario & immediato significato, ut: *homo est species*, ubi *ly homo* sumitur tantum pro natura humana, ad quam significandam primariò est institutum, non verò pro Petro & Paulo, cæterisque significatis mediatis.

Suppositio Personalis vel realis est, acceptio termini non solum pro suo significato primario & immediato, sed etiam pro secundario & mediato, ut: *Homo est animal rationale*, hic ho-

*mo lumen & pro natura humana, & pro Pe-
tro & Paulo &c. pro cuius notitia*

14 Advertendum. Duplex est significatum termini, *Mediatum scilicet, & Immedia-
tum.* Significatum *Immediatum* vel primarium & formale est illud, ad quod significan-
dum terminus per se *primariò* est institutus. Significatum *mediatum* vel secundarium, &
materiale est, ad quod significandum termi-
nus tantùm est institutus *secundariò*, & per
quandam extensionem, in quantum signifi-
catum primarium se extendit ad significata
secundaria, sic terminus: *Homo*, primariò
est institutus ad significandam naturam hu-
manam, & quia natura humana se extendit
ad Petrum & Paulum, hinc Petrus, Paulus
&c. in quibus natura humana invenitur,
sunt significata secundaria termini: *Homo*.
Econtra hæc vox: *Petrus est primariò instituta*
ad significandum hunc singularem homi-
nem, & *secundariò* ad significandam naturam
humanam, quæ invenitur in Petro.

15 Regulæ cognoscendi, an terminus suppo-
nat simpliciter, vel personaliter, sunt se-
quentes:

Regula prima est, quando prædicatum est
terminus secundæ intentionis, subjectum sup-
ponit simpliciter. Quando autem prædica-
tum

tum est terminus primæ intentionis , subje-
ctum supponit personaliter. Unde sequitur.

Regula 2da , quod terminus NB. primæ intentionis sit in suppositione simplici , quando non potest descendere à primario ejus significato , ad significatum secundarium , ut patet in hac propositione : *homo est species* , ubi non valet descensus ab homine ad Petrum , dicendo : ergo *Petrus est species*. Econtrario terminus est in suppositione Personalis , quando valet descentus à significato termini primario ad secundarium , sic à subjecto hujus propositionis : *homo est animal* , benè potest descendere ad Petrum , de eoque prædicari *animal* , dicendo , ergo *Petrus est animal*.

Dicitum est : Terminus NB. primæ intentionis , quia si subjectum sit terminus secundæ intentionis , tunc etiam in suppositione simplici fieri potest descentus , ut : *genus est universale* , ergo *animal est universale*.

CONCLUSIO IV. Suppositio persona- 16
lis dividitur in *Communem* , *Singularem* , *Essen-
tialem & Accidentalem*.

Declaratur : Suppositio Communis est , quando terminus positus in propositione est *communis* , ut : *homo est animal*.

Suppositio Singularis est , quando terminus positus in propositione est *singularis* , ut : *Petrus est homo*.

Suppositio Essentialis vel naturalis est, acceptio termini pro aliquo, cui prædicatum convenit *essentialiter*, ideoque supponit pro *omnibus* suis inferioribus [sive existant, sive non existant) vel propter essentialem & necessariam *connexionem* inter prædicatum & subjectum, ut: *homo est animal rationale*, vel propter essentialem repugnatiā prædicati & subjecti: ut: *homo non est brutum*, & tales propositiones dicuntur *æternæ veritatis*, quia nimirum quoad suam veritatem non dependent à determinato tempore, & hinc in talibus propositionibus copula nunquam designat differentiam temporis, penes quam vel attendatur acceptio termini, vel veritas propositionis, sed solum indicat, essentialēm connexionem ext̄emorum, si illæ propositiones sint affirmativæ, vel essentialēm eorum repugnatiā, si sint negativæ.

Suppositio Accidentalis est, acceptio termini pro aliquo, cui prædicatum convenit *accidentaliter*, ideoque supponit tantum pro suis significatis, quibus prædicatum convenit secundum illam differentiam temporis, quæ per copulam importatur, ut: *Petrus disputat*, ubi Petrus accipitur pro eo, qui disputat tempore præsenti.

17 Dices. Omnis suppositio est naturalis,
ergo

ergo non datur suppositio accidentalis, P.
ant. omnis suppositio est proprietas termini,
sed omnis proprietas est naturalis, quia na-
turaliter convenit subiecto, cuius est pro-
prietas, ergo.

R. D. ant. Omnis suppositio est natura-
lis per ordinem ad essentiam termini C. ant.
per ordinem ad connexionem praedicati cum
subiecto, N. ant. Suppositio naturalis ex
eo dicitur, quod praedicatum subiecto na-
turaliter vel essentialiter connectatur, talis
autem connexio non est in propositione ac-
cidental, ergo neque in illâ terminus sup-
ponit naturaliter, sed accidentaliter vel
contingenter.

CONCLUSIO V. Suppositio communis dividitur in Collectivam, Distributivam, Determinatam, & Confusam.

Declaratur: Suppositio Collectiva sit, dum terminus *communis* accipitur pro suis significatis *simul* sumptis, & in *unicâ* propositione, vel affirmativâ per particulam, &, in negativâ per particulam *nec*, singu-
lis significatis interpositam *simul* enumera-
randis, ut in hac propositione: *Elementa
sunt quatuor*, ly elementa supponit collecti-
vè, unde non poteris inferre: ergo *ignis
est quatuor*, sed debent simul enumerari om-
nia

nia significata subjecti dicendo : ergo ignis, & aér, & aqua, & terra sunt quatuor.

Suppositio Distributiva fit, quando terminus communis accipitur pro omnibus suis significatis, tūm seorsim tūm simul sumptis, In hac suppositione sumuntur significata vel inferiorā seorsim, quando de singulis per distinctas propositiones particulā & vel nec connexas, prædicatur terminus ille, qui antea prædicatus erat de termino communi, ut : *homo est animal, ergo & Petrus est animal, & Paulus est animal, & Joannes est animal, &c.* Item : *homo non est brutum, ergo nec Petrus est brutum, nec Paulus est brutum, &c.* Sumuntur autem inferiora simul, ut ante dictum est de suppositione collectivā, sic : *homo est animal ergo & Petrus & Paulus & Joannes est animal, item, homo non est brutum, ergo nec Petrus, nec Paulus, nec Joannes est brutum.*

19 Suppositio distributiva subdividit in *completam & incompletam.*

Suppositio distributiva completa fit, quando descendit ad *omnia individua*, ut : *animal est sensitivum, non enim sola species animalium, sed etiam singula animalia in particulari sunt sensitiva.*

Suppositio Distributiva Incompleta fit, quando non descendit ad *omnia individua*

dūa, sed solum ad omnes species, ut dum dico: omne animal fuit in arcâ Noë, ubi animal sumitur pro omnibus speciebus animalium.

Advertendum. Quod suppositio completa 20
vocari soleat acceptio termini pro singulis
generum, & incompleta pro generibus singulo-
rum, ubi tamen ly: genus non sumitur stri-
ctè, sed latè, ut idem sit ac species, sicut
dici solet: inter Apostolos Iudas in specie fuit
proditor, cum regulariter dici deberet. Iudas
in individuo.

Suppositio completa etiam dicitur *Absolu-*
tuta, quando scilicet terminus accipitur pro
omnibus individuis *nullo excepto*, ut ostensum
est in propositione: *animal est sensitivum*.
Suppositio incompleta etiam dicitur *Accom-*
moda, quando terminus sumitur *cum excep-*
tione unius aut alterius individui, ut sit in
hac propositione: *omnis homo contraxit pec-*
tatum originale, ubi subintelligitur: *exceptis*
Christo & B. V. Mariâ.

Suppositio determinata est acceptio ter- 21
mini *communis* pro suis inferioribus seorsim
enumerandis, donec deveniatur ad unum
de quo verificatur *prædicatum* propositionis.
In hac suppositione inferiora
enumerantur seorsim, dum de singulis for-
mantur propositiones connexæ per particu-
lam vel, ut: aliqua dies vita erit ultima, ergo
vel

vel hæc dies erit ultima, vel illa dies erit ultima, & sic de cæteris, donec deveniatur ad diem illam, de qua prædicatum ultima verificatur.

Suppositio confusa est, acceptio termini *communis* pro suis inferioribus *simul* enumera-
randis, quorum nulli determinatè conve-
niat prædicatum. In hac suppositione infe-
riora enumerantur *simul*, si de illis omnibus
formetur unica propositio, & singulis inter-
ponatur particula disjunctiva *vel*, ut: *aliquis*
oculus est necessarius ad videndum, ergo vel
oculus dexter, vel oculus sinistus est necessarius
ad videndum, ubi prædicatum necessarius ad
videndum nec determinatè affirmatur de
oculo dextero, nec de sinistro.

Advertendum imò circà suppositionem
22 determinatam, quod in hac propositione:
aliqua dies vitæ erit ultima, subjectum sit in-
determinatum *quoad nos*, quia vi illius pro-
positionis non determinatur, quænam sit illa
dies, de qua verificatur, quod sit *ultima*,
subjectum tamen supponit pro una die de-
terminata *quoad se*.

23 2dò, Circa suppositionem confusam,
quod in hac vel simili propositione: *Aliquis*
oculus est necessarius ad videndum subjectum
per se supponat confusè, per accidens tamen
possit supponere determinatè, quia mono-
culo

culo ad videndum necessarius est determinatè unus ille oculus, quem habet, sic etiam in hac propositione: *Fides est necessaria ad salutem*, ly Fides supponit determinatè pro *Fide Catholicā*, ex suppositione, quod non detur alia vera Fides præter Catholicam.

Quæres. Ex quibus regulis cognosci de 24 beat, an terminus supponat collectivè, an distributivè & an confusè, an determinatè. Ante Relponsionem advertendum, quod suppositiones præcipue variantur variatis quibusdam syncategorematis, quæ vocari solent *signa Logica*, quibus termini communes afficiuntur. Sunt autem illa in duplice differentiâ, alia sunt universalia, vel affirmativa, ut *omnis*, vel negativa, ut: *nullus*, alia sunt particularia, vel affirmativa, ut *aliquis*, vel negativa, ut *aliquis non*.

His positis pro suppositione subjecti traditur

Regula prima: Subjectum affectum signo 25 universalis supponit vel distributivè, vel collectivè juxta exigentiam prædicati, ut: omnis homo est admiratus, ubi subjectum supponit distributivè. In hâc autem propositione: omnes Planetæ sunt septem: subjectum supponit collectivè, sic enim exigit prædicatum, quod est terminus collectivus.

Regula 2da: Subjectum affectum signo parti 26

supponit vel determinatè vel confusè *juxta exigentiam prædicati*, unde: subjectum hujus propositionis: *aliquis homo est niger*, supponit determinatè, subjectum verò hujus propositionis: *aliqua navis est necessaria ad navigandum*, supponit confusè, quia prædicatum involvit, unum ex signis confusionis: qualia sunt: *necessarium, promissum, donum, debitum & similia*.

27 *Regula 3ta.* Si subjectum sit terminus mixtus, supponit *juxta exigentiam syncategorematis subintellecti*, idèoque resolvi debet, ut in hac propositione: *nemo est immortalis*, subjectum supponit distributivè, cum *nemo* sit *idem*, ac *nullus homo*, & in hac propositione: *alteruter erit victor*, subjectum supponit determinatè, quia *alteruter idem est*, ac *unus ex duobus*, & sic proportionaliter judicandum est de signis æquipollentibus.

28 *Regula 4ta.* Subjectum non affectum signo supponit distributivè, si propositio sit in materia necessariâ vel impossibili, quia propositio indefinita in materia necessariâ & impossibili æquivalet universalis, ut dictum est de propositione N. 24. Si autem propositio sit in materia contingente, subjectum supponit vel determinatè vel confusè *juxta exigentiam prædicati*, quod patet ex Regulâ 2dâ.

Regula 5ta. Subjectum supponit distributive, si sit terminus communis, & penes se habeat particulam *solis*, similiter si prædicatum sit nomen comparativum, vel superlativum, ut: *solus canis latrat*, *leo est animalium fortissimum*, *equus est fortior lepore*.

Pro suppositione prædicati assignatur.

Regula 1ma. Prædicatum taliter supponit, qualis est terminus, unde si prædicatum sit terminus *primæ intentionis*, supponit personaliter. Si sit terminus *secundæ intentionis*, supponit simpliciter. Si sit terminus *collectivus*, supponit collectivè, &c.

Regula 2da. Prædicatum propositionis affirmativæ, vel universalis, vel particularis
NB. Regulariter supponit determinatè, ut prædicatum hujus propositionis: *Homo est animal* supponit pro determinata specie animalis, prædicatum hujus propositionis: *Petrus est homo*, supponit pro determinato individuo.

Dictum est Regulariter, quia per accidens fieri potest, ut prædicatum propositionis universalis affirmativæ propter vertibilitatem cum subiecto, supponat distributivè, ut sit in hac propositione: *homo est rationalis*.

Regula 3ta. Prædicatum propositionis negativæ, vel universalis vel particularis sup-

ponit distributivè, ut: *nullus homo est brum.*
aliquis homo non est equus.

ARTICULUS TERTIUS.

De ceteris proprietatibus Terminorum.

33 **C**ONCLUSIO I. Ampliatio est extensio termini, vel acceptio extendens terminum à minore suppositione ad maiorem suppositionem, unde terminus tunc dicitur ampliari, dum vel importat supposita plura, vel differentias temporis plures, quam copula importet, ut: *homo curret*, ubi *ly homo* non accipitur tantum pro homine futuro, sed etiam pro præsenti.

34 Quæres. Quotuplex sit ampliatio?

C. Duplex, alia est *Temporum*, alia *Suppositorum*. Ampliatio Temporum fit, quando terminus non tantum supponit pro eo tempore, quod per copulam importatur, sed etiam pro alio, ut in hac propositione: *Antichristus peccabit*, ubi *Antichristus* ampliatur ad tempus tam præsens quam futurum, ut sensus propositionis sit: *Antichristus, quando est velerit, peccabit.*

Ampliatio Suppositorum fit, quando terminus accipitur pro pluribus suppositis, quam per copulam importantur, ut: *homo peccavit*, ubi *homo* accipitur, tam pro homine præsenie, quam præterito, & sensus

sus propositionis est: *homo, qui est vel fuit, peccavit.*

Advertendum. Ampliatio temporum 35 locum habet tam in termino singulari, quam communi. Ampliatio suppositorum tantum cadit in terminum communem, non vero in singularem, cum hic non possit pro pluribus accipi.

Regulae Ampliationis sunt sequentes: 36

Regula 1ma: Verbum præteriti temporis ampliat subjectum ad præsens & præteritum, ut: *senex fuit puer*, ubi ly senex stat prosene qui est velfuit, ly puer vero stat pro puero, qui fuit.

Regula 2da: Verbum futuri temporis am- 37 pliat subjectum ad præsens & futurum, sed restringit prædicatum ad futurum, ut: *puer erit senex*, ubi ly puer stat pro puero, qui est velerit, ly senex stat pro lene, qui erit.

Regula 3ta: Verbum Potest ampliat sub- 38 jectum & prædicatum ad tempus præsens, præteritum futurum & possibile, ut: *Homo potest esse albus*, ubi tam ly homo quam albus stat pro eo, qui vel est, vel fuit, vel erit, vel potest esse.

Regula 4ta: Adverbium: imaginabiliter 39 positum in propositione, ampliat subjectum & prædicatum ad omnes differentias tempo-

ris, ut: *homo imaginabiliter currit*, ubi tam *homo*, quam *currens accipitur vel pro praesenti, vel pro præterito, vel pro futuro, vel pro possibili, vel pro imaginabili*. Unde.

Colliges. Quod quidem apud Physicos sint tres differentiae temporis, scilicet *praesens, preteritum, & futurum*, apud Dialeticos tamen sint quinque, *praesens, preteritum, futurum, possibile, imaginarium*.

40 Regula 5ta: Termini significantes prioritatem aut *inceptionem*, ampliant terminos, quibus applicant suum significatum, ad *praesens vel futurum*: ut, *Pater est prior Filio*, ubi ly *Pater* supponit pro illo, qui *est vel erit*. Similiter: *lectio incipit*, ubi ly *lectio* supponit pro *lectione*, quæ nunc *primum est*, vel *immediatè post erit*.

41 Regula 6ta: Termini significantes posterioritatem aut *desitionem* ampliant ad *praesens vel præteritum*, ut: *Filius est posterior Patre*, ubi ly *Filius* accipitur pro illo, qui *est vel fuit*. Similiter: *lectio desinit*, ly *lectio* accipitur pro illâ, quæ *est*, vel *immediatè ante fuit*.

42 CONCLUSIO II. *Restrictio* est *limitatio termini à majore ad minorem suppositionem*, ut: *homo justus diligit Deum*, ubi ly *homo* restringitur ad solum *justum*.

Restrictio opponitur *ampliationi*, & quia

quia tot modis dicitur unum oppositorum, quod modis dicitur alterum, hinc restrictio etiam dividitur in aliam Temporum, & aliam Suppositorum.

Restrictio Temporum fit, quando terminus limitatur ad pauciores differentias temporis, ut: Imperator, qui modo est, triumphabit, ubi ly Imperator restringitur ad solum praesentem.

Restrictio suppositorum fit, quando terminus limitatur ad pauciora supposita, ut: homo doctus promovebitur.

Quæres. Quot modis fiat restrictio? 43

R. Quatuor: 1^o, dum substantivo additur adjективum, ut: studiosus piger contemnitur. 2^o, dum termino apponitur casus obliquus, ut: doctrina S. Thome est tutissima. 3^o, dum termino additur substantivum minus commune, ut: Rex Alexander devicit mundum. 4^o, si addetur copula implicationis, ut: homo, qui colit B. Virginem, non peribit.

CONCLUSIO III. Alienatio est Translatio termini à propriâ ad impro priam significacionem, ut: homo est pictus, ubi terminus homo, qui propriè significat animal rationale, per prædicatum pictus transfertur ad significandam imaginem hominis pictam. Porro Adjectivum, quod alienat subjectum, de-

bet poni ex parte prædicati, talia enim sunt
subjecta, qualia permittuntur à suis prædicatis,
quando autem adjectivum ponitur ex parte
subjecti, tunc subjectum non alienat, sed
restringit, ut: *homo marmoreus est statua.*

45 CONCLUSIO IV. Diminutio est li-
mitatio termini totaliter supponentis, ad sup-
ponendum pro aliquâ parte, ut: *Æthiops est*
albus secundum dentes, ubi ly *albus*, quod
alias supponit absolute pro toto, limitatur
per additas particulas: *secundum dentes*, ut
tantum supponat pro parte. Talis limita-
tio vocatur *dictum secundum quid*, pro quo

46 Advertendum, si forma nata sit inesse
toti & parti, tantum verò insit parti, for-
ma dicitur toti convenire tantum secundum
quid, ut: albedo potest inesse toti corpori,
& dum inest soli parti corporis v. g. denti-
bus *Æthiopis*, dicitur *Æthiops albus se-*
cundum quid, vel cum addito, *secundum*
dentes. Si verò forma possit tantum inesse
parti, tunc, dummodò illi insit, forma
dicitur toti convenire simpliciter, sic claudi-
cato tantum potest inesse parti hominis, scilicet
pedi, & hinc si homo pede claudicet,
dicitur *simpliciter claudus*.

47 CONCLUSIO V. Appellatio est ap-
plicatio significati formalis termini appellantis
ad significatum formale vel materiale termini
appel.

appellati. Ad intelligendam hanc definitionem.

Recollendum ex dictis de terminis N.
52. quod terminus tam concretus, quam connotatus habeat duplex significatum; aliud *formale*, quod est ipsa forma, aliud *materiale*, quod est subjectum formæ. Deinde

Advertendum. Terminus *Appellans* est⁴⁸ ille, qui suum significatum *formale* vel *formam*, quam significat, applicat termino, suprà quem cadit, & terminus *appellatus* est ille, cui significatum *formale* alterius termini applicatur, sic dum dicitur: *Plato est magnus Philosophus*, ly *magnus* dicitur terminus *appellans*, quia tribuit denominationem termino adjuncto: *Philosophus*. Terminus *appellatus* autem est *Philosophus*, cum hic denominetur *magnus*, ex quo exemplo patet, quod non tantum appellare possit prædicatum supra subjectum, sed etiam una pars prædicati supra alteram. Similiter, dum dicitur: *album est dulce*, terminus *appellans* est *dulce*, terminus vero *appellatus* est *album*.

Quæres imò. Quotuplex sit appellatio⁴⁹

R. Duplex, alia *Materialis*, alia *Formalis*. Appellatio *Materialis* est, quando significatum *formale* termini appellantis ca-

dit suprà significatum *materiale termini* appellati, v. g. *Medicus cantat*, hìc *cantare*, quod est significatum *formale termini* appellantis non convenit *Medico spectato secundùm formam*, vel *Artem Medicam*, id est, non convenit *Medico formaliter*, quatenus *medicus* est, sed tantùm *materialiter convenit subjecto* vel homini, qui est *medicus*, unde in dictâ propositione est appellatio *Materialis*.

Appellatio *Formalis* est, quando significatum *formale termini* appellantis cadit suprà significatum *formale termini* appellati, v. g. *Medicus sanat*, ubi *sanare* convenit *medico formaliter spectato secundùm formam* vel *Artem Medicam*, & hinc est appellatio *Formalis*.

Quæres 2dò. Ex quibus regulis dignoscatur, an fiat appellatio *formalis*; an *materialis*?

50 R. Varias eas passim assignari, sed cum in propositionibus quoad terminos eodem modo dispositis subjectum inveniatur, aliquando *materialiter*, aliquando *formaliter* appellatum, ut constat ex his 1. *album est dulce*, 2. *album est coloratum*, 3. *homo justus est dives*, 4. *homo justus est amicus Dei*, 5. *Alexander magnus fuit discipulus Aristotelis*, 6. *Alexander magnus à Curtio est laudatus*, in quarum

quarum propositionum *imā*, *ȝtiā*, *grā* & *6ā* est appellatio materialis, in cæteris est appellatio formalis, propterea ad dignoscendam appellationem observanda est:

Regula infallibilis, quando particulæ reduplicativæ quatenus, in quantum, prout & similes possunt addi termino appellato manente veritate propositionis, signum est appellationis *formalis*. Si verò tales particulæ termino appellato non possint addi salvâ veritate propositionis signum est appellationem esse *materialem*, v.g. si dubitetur, quænam appellatio fiat in his propositionibus: *album est coloratum*, *album est dulce*, ita procedendum est. subjecto primæ propositionis additur particula reduplicativa: *quatenus dicendo: album quatenus album, est coloratum*, & quia manet propositio vera, & albedo est *ratio formalis*, quare significatum formale prædicati scilicet *color* conveniat subjecto, inde colligitur fieri appellationem *formalem* In altera verò propositione: *Album est dulce*, quia cum veritate dici non potest, *album quatenus album est dulce*, sed dicendum est: *album, quod est album, est dulce*, colligitur esse appellationem *materialem*. Ubi

Advertendum imò, quod ad hoc ut ap-⁵¹pellatio formalis colligatur ex particulis: *quatenus*, *prout*, &c. non sufficiat per illas redu-

reduplicari puram conditionem, sine qua prædicatum non conveniret subiecto, sed debeat reduplicari ipsa causa vel ratio formalis. Unde in hac propositione: *ignis quatenus applicatus, urit*, non sit in rigore Dialetico appellatio formalis, quia ly: *quatenus non reduplicat rationem formalem*, quare uestio conveniat igni, sed tantum conditionem sine qua non, approximatio enim non est ratio vel causa uestionis, sed purè conditio ad urendum requisita.

52 2dò. Dictæ particulæ debent accipi propriè & in sensu *reduplicativo*, non verò abusivè & in sensu *specificativo*, in quo tantum explicant concomitantiam prædicati cum subiecto, ideoque in hac propositione: *Soi, quatenus illuminat exsiccat* (quæ in sensu proprio & rigoroso est falsa) non sit appellatio formalis, quia particula: *quatenus specificativè accipitur*, & indicat præcisè simultatem virtutis illuminandi & exsiccandi in sole, non verò accipitur reduplicativè, reduplicando causam exsiccationis, si enim illuminatio esset causa, quare sol exsiccaret, deberet exsiccare omnes res, quas illuminat, quod falso esse patet, v. g. in Cera.

Pto terminis numeralibus datur

53 Regula specialis, Numeralia primitiva, ut: *duo, tres*, si applicentur substantivis, appellant


lant tam formaliter, quam materialiter; ideoque multiplicant & formam, & subjectam, ut: video duos homines, quæ propositio facit hunc sensum, video duo individua habentia duas humanitates. Siverò applicentur nominibus adjectivis, appellant solum materialiter, ideoque non multiplicant formam, sed subjectum: ut video tria rotunda, id est: video tria subjecta habentia rotunditatem.

Quæres 3rđ. Quid Dialectici intelligent⁵⁴ per Statum & Distractionem termini?

R. 1mō. Status est acceptio termini pro sola differentia temporis per copulam importati, v.g. homo ambulat, ubi homo tantum sumitur pro homine praesente; non autem pro præterito, vel futuro, & dicitur habere *Statum*, quia non extenditur ultra tempus per copulam significatum: Status tantum habet locum in propositionibus contingentibus.

R. 2dō. Distractio est acceptio termini pro ⁵⁵ eo, quod non existit pro differentia temporis per copulam importati, ut: cæci vident, cum enim termini illius propositionis cæcus & videns significant formas incompossibiles, necessariò ad diversa tempora recurrentum est, ut propositio verificetur in hoc sensu: qui antea fuerunt cæci, jam vident. Similiter distractio fit in hac enunciatione: proposizio resolvitur in subjectum & prædicatum, cuius

jus sensus est: *Propositio resolvitur in terminos, qui antea in propositione fuerunt subjectum & prædicatum.*



INFORMATIO QUARIA.

De Proprietatibus Propositionis.

1. **Q**uemadmodum ex habitudine, quam unus Terminus in propositione dicit ad alterum, resultant variæ proprietates terminorum jam explicatæ, ita ex comparatione unius propositionis ad aliam, earumque variâ combinatione secundùm quantitatem & qualitatem, enascuntur proprietates propositionum, quæ sunt *Oppositio*, *Æquipollentia*, & *Conversio* de quibus hic agendum.

ARTICULUS PRIMUS

De Oppositione.

2. **C**ONCLUSIO I. *Oppositio est affirmatio & negatio, ejusdem de eodem.*

Explicatur Definitio. Dicitur imò. *Affirmatio & negatio*, quæ particulæ ponuntur pro genere, omnis enim oppositio est affirmatio & negatio, non tamen omnis affirmatio & negatio est oppositio. Porro ad oppositionem Logicam requiruntur duæ propositiones, quarum una sit affirmativa, altera nega-

negativa; proinde negatio & affirmatio cādant supra copulam principalem.

Dicitur 2dō. *Eiusdem de eodem.* Quæ particulæ ponuntur pro differentia, & sic intellegendæ sunt, quod debeat esse omnino idem prædicatum, & omnino idem subjectum, & quidem termini debent esse iidem.

1mō. Quoad nomen & casum nominis.
2dō. Quoad rem significatam. 3tō. Quoad suppositionem & alias proprietates. NB. Suppositio tamen distributiva & determinata commutari debent in omni oppositione propriè tali, ex parte prædicati, & in contradictoria etiam ex parte subjecti. 4tō. Quoad integratatem. 5tō. Quoad circumstantias loci & temporis. Unde vera oppositio non exercetur in sequentibus.

1mō. *Petrus est diligens, Petrus non est doctus. Liber est Petri, liber non est Petrus.* 2dō, *Canis (terrestris) latrat, canis (marinus) non latrat.* 3tō. *Homo (in suppositione simplici) est species, homo (in suppositione personali) non est species.* 4tō. *Logicus studet, Logicus non studet diligenter.* 5tō. *Sol lucet (de die) Sol non lucet (de nocte)* 6tō. *Imperator est Viennæ (in Austria) Imperator non est Viennæ (in Gallia.)*

CONCLUSIO II. Oppositio dividitur
in Contrariam, Subcontrariam, & Contradictriam.

Ratio

Ratio est, quia oppositio est affirmatio & negatio ejusdem de eodem, ergo tot modis fit oppositio, quot modis inter propositiones intercedit affirmatio & negatio, sed tribus tantum modis inter propositiones exercetur affirmatio & negatio, vel enim illa fit inter duas propositiones *universales*, & sic est oppositio *Contraria*, vel fit inter duas propositiones *Particulares*, & sic est oppositio *Subcontraria*, vel fit inter duas propositiones unam *universalem*, alteram *particularem*, & sic est oppositio *Contradictoria*, ergo tres tantum sunt modi oppositionis. Est itaque

Oppositio *Contraria* affirmatio & negatio inter duas propositiones *universales* ejusdem subjecti & praedicati, ut: *Omnis homo est Justus, nullus homo est Justus.*

Oppositio *Subcontraria* est affirmatio & negatio inter duas propositiones *particulares* ejusdem subjecti & praedicati, ut: *aliquis homo est Philosophus, aliquis homo non est Philosophus.*

Oppositio *contradictoria* regulariter fit, quando est affirmatio & negatio inter duas propositiones ejusdem subjecti & praedicati, quarum una est *universalis*, altera *particularis*, ut: *omnis homo est probus, aliquis homo non est probus, vel nullus homo est probus, aliquis homo est probus.*

Datur

Datur etiam alia oppositio, quæ dicitur ⁴
Subalterna, & sit vel inter duas propositiones
affirmativas, vel inter duas *negativas*, ut, si
una *affirmativa* sit *universalis*, altera *affir-
mativa* sit *particularis*, sic etiam de duabus
negativis, ut; *Omnis homo est animal*, *aliquis
homo est animal*; & *nullus homo est malus*,
aliquis homo non est malus. Dicitur hæc op-
positio *Subalterna*, quia propositio particu-
laris, quæ dicitur *subalternata*, continetur
sub universalis; quæ dicitur *subalternans*. Hæc
tamen non est oppositio *propriè* & *simpliciter
dicta*, quia non intercedit *affirmatio*
& *negatio*, dici tamen potest oppositio *se-
cundum quid*, quia ambæ propositiones op-
ponuntur *secundum quantitatem*. Circâ op-
positionem *Contradicторiam*.


Advertendum, si subjectum propositionis ⁵
sit terminus *communis supponens distributi-
vè*, vel determinatè, tunc ut fiat ejus contra-
dictoria, non tantum debet mutari *qualitas*
propositio*nis*, sed etiam *quantitas*, v. g. ut
fiat contradictoria hujus: *Omnis homo est
rationalis*, debet formari propositio particu-
laris *negativa*, per ly *aliquis non*, dicendo:
aliquis homo non est rationalis; si vero sub-
jectum propositionis sit terminus *singularis*,
aut si sit terminus *supponens* vel *simpliciter*,
vel *collectivè*, vel *confusè*, *quantitas propo-*

sitionis mutari non debet, si enim formandā esset contradictoria hujus: *Omnēs Evangelistae sunt quatuor, & diceretur: aliquis Evangelista non est quatuor,* propositiones non essent contradictoriæ, cum utraque sit vera, ut ergo similiūm propositionum contradictoriæ formentur, reliquā earum quantitatē, & suppositione, penes copulam ponenda solum est particula *non*, v.g. *Omnēs Evangelistae sunt quatuor, omnes Evangelistae non sunt quatuor.* *Aliquis calamus est necessarius ad scribendum, aliquis calamus non est necessarius ad scribendum* *Petrus est miles, Petrus non est miles.* *Animal est genus, animal non est genus, &c.*

6. Dubitabis. Quomodo opponantur hæduæ propositiones: *omnes homines currunt, aliqui homines non currunt.*

R^e. Illas non pertinere directè ad aliquam oppositionem, sed tantum reductivè. Ratio est, quia in primis non pertinent directè ad contrariam, cum una illatum sit particularis. Deinde non ad Contradicторiam, cum ambæ possint esse falsæ, supposito, quod tantum unus homo curreret. Neque etiam ad subcontrariam, cum una sit universalis: Nec demum ad subalternam: cum una sit affirmativa, altera negativa. Reducuntur tamen ad oppositionem contrariam, quia utraque potest esse falsa (ut dictum est) quod in sola oppositione contrariâ locum habet. Sche-

Schema Oppositionum.



Quæres, quot sint Leges Oppositionum?

R. Tres, Ima pro Contrariis est duæ propositiones contrariæ in nullâ materiâ possunt esse simul veræ, possunt tamen esse simul falsæ in materiâ contingente, v. g. *Omnis homo est doctus*, *nullus homo est doctus*.

Ratio imæ partis est, quia si duæ contrariæ essent simul veræ, sequeretur etiam duas contradictorias esse simul veras, ad veritatem enim duarum contrariatum, quæ sunt universales, requiritur etiam veritas omnium particularium, quæ continentur sub universalibus, si autem universalis affirmativa comparetur cum particulari negativâ, & universalis negativa cum particulari affirmativâ, utrumque erit oppositio contradictoria, & omnes supponuntur veræ, ergo duæ contradictoriæ essent simul veræ.

Ratio 2dæ partis est, quia illa propositione est falsa, quæ significat necessariam habitudinem terminorum, quæ tamen non est, sed duæ propositiones contrariæ in materiâ contingente, significant *necessariam* habitudinem terminorum, quia ambæ sunt universales, & tamen necessaria habitudo terminorum non adest, quia sunt propositiones *contingentes*, ergo duæ contrariæ possunt esse falsæ in materiâ contingente. Exinde

8 Colliges imò. Quare propositiones contrariæ possint esse falsæ in materiâ contingente, non tamen in materiâ necessariâ vel impossibili. Ratio disparitatis est, quia in propositione contingente non est necessaria ter-

terminorum connexio aut repugnantia, v. g. *esse album* potest convenire uni homini, quin conveniat alteri, dum igitur prædicatum *albus* convenit uni, falsa est hæc universalis negativa, *nullus homo est albus*, & dum *esse album* non convenit alteri, falsa est hæc universalis affirmativa, *omnis homo est albus*, & hoc ipso duæ contrariæ in materia contingente sunt falsæ. Sed propositio in materia necessariâ dicit necessariam terminorum connexionem, & propositio in materia impossibili dicit necessariam repugnantiam, unde si prædicatum necessariò conveniat uni, etiam convenit alteri, v. g. *esse hominem* convenit Petro, Paulo, & omnibus individuis humanis, & sic ex propositionibus contrariis in materia necessaria, affirmativa est vera, & negativa est falsa, v. g. *Omnis homo est animal*, *nullus homo est animal*. Si verò prædicatum necessariò repugnet uni, etiam repugnat alteri, v. g. *esse lapidem* repugnat uni & omnibus hominibus, & ex propositionibus contrariis in materia impossibili affirmativa est falsa, & negativa est vera, v. g. *Omnis homo est lapis*, *nullus homo est lapis*.

Colliges 2dò. Quare ad veritatem contrariarum in materia contingente requiratur omnes particulares sub universalibus

contentas esse veras, non vero ad falsitatem contrariarum in eadem materiam requiratur omnes particulates esse falsas,

Ratio haec est, quia bonum est ex integrâ causâ, malum ex quocunque defectu, veritas autem est de linea boni, ergo ad veritatem contrariarum requiritur integra causa, id est, ut omnes particulates sint verae, falsitas est de linea mali, ergo ad falsitatem sufficit aliquis defectus, id est, quod una particula sit falsa.

10. Lex 2da pro Subcontrariis est, duæ propositiones subcontrariae, in nullâ materiam possunt esse simul falsæ, possunt tamen esse simul verae in materiam contingente, v. g. aliquis homo est justus, aliquis homo non est justus.

Ratio 1mæ partis est, quia si duæ subcontrariae essent simul falsæ, ergo earum contradictoriae essent simul veræ, & simul falsæ, in primis duæ contradictoriae essent simul veræ, si enim falsa esset haec particularis affirmativa, aliquis homo est justus, ergo universalis negativa: nullus homo est justus, esset vera, & si falsa esset haec particularis negativa, aliquis homo non est justus: vera esset haec universalis affirmativa, omnis homo est justus, & hoc ipso duæ contrariae essent veræ, ex veritate autem duarum contrariarum, infer-

fertur veritas duarum contradictiarum, ut N. 7. ostensum est.

Deinde duæ contradictoriarum essent simul falsæ, quia ex falsitate duarum particularium sequitur falsitas duarum universalium, juxta N. 8. unde si falsæ essent hæc duæ subcontraria: *aliquis homo est justus*, *aliquis homo non est justus*, falsæ etiam forent hæc duæ contraria: *omnis homo est justus*, *aliquis homo est justus*, ex quibus universalis affirmativa contradicit particulari negativæ: & universalis negativa contradicit particulari affirmativæ: supposito igitur, quod essent propositiones omnes falsæ, etiam duæ contradictoriarum essent simul falsæ.

Ratio ad partis est, quia ex veritate duarum particularium, non sequitur veritas duarum universalium, & ex consequenti non inferatur veritas duarum contradictiarum. Imò potius ex falsitate duarum universalium sequitur veritas duarum particularium, si enim falsa est hæc propositione universalis: *omnis homo est justus*, vera erit ejus contradictoria, *aliquis homo non est justus*, & ex falsitate hujus universalis, *nullus homo est justus*, sequitur veritas contradictoriarum: *aliquis homo est justus*, cum ergo duæ propositiones universales contrariae, in materia contingente possint esse fallæ,

poterunt dux propositiones subcontrariæ
in materiâ contingente esse veræ.

II *Lex 3tia pro contradictoriis est*: Duæ propositiones contradictoriæ, nunquam possunt esse simul veræ, & nunquam simul falsæ: v. g. *Omnis homo est risibilis*, *aliquis homo non est risibilis*. *Nullus homo est risibilis*, *aliquis homo est risibilis*.

Ratio est, quia idem non potest simile esse, & non esse, ut lumine naturæ notum est, sed in oppositione contradictoriâ idem de eodem semel affirmatur, quod sit, v. g. *omnis homo est risibilis*, & semel negatur quod sit, v. g. *aliquis homo non est risibilis*, ergo si vera sit propositio affirmativa: *omnis homo est risibilis*, non poterit esse vera propositio negativa, *aliquis homo non est risibilis*, unde natum est axioma. *Oppositio contradictoria est omnium maxima*. Tum quia involvit repugnantiam maximam, & hinc inter duo contradictoria non potest dari medium. Tum quia plus destruit, quam aliæ oppositiones, contraria enim & subcontraria destruunt qualitatem, & retinent quantitatem, contradictoria autem destruit utramque. Item oppositio contraria admittit falsitatem, & subcontraria veritatem duarum propositiorum contingentium, contradictoria neutram admittit.

Lex quarta addi solet pro Subalternis (li- 12
cet non spectet ad oppositionem propriè
dictam, ut visum est N. 4.) si duæ propo-
sitiones subalternæ sint in materiâ uicecessariâ,
vel impossibili, semper sunt simul veræ, vel
simul fallæ. In materiâ necessariâ veræ sunt:
Omnis homo est animal, aliquis homo est animal.
Fallæ: *nullus homo est animal, aliquis homo non*
est animal. In materiâ impossibili veræ sunt:
nullus homo est lapis, aliquis homo non est lapis.
Fallæ: *omnis homo est lapis, aliquis homo est lapis.*

Ratio patet ex superioribus, quia in ma-
teriâ necessariâ est necessaria connexio ex-
tremorum, quæ semper verificat propositiones affirmativas, & falsificat negativas. Si-
militer in materiâ impossibili est necessaria
repugnantia, quæ semper falsificat affirmati-
vas, & verificat negativas. Si verò duæ pro-
positiones subalternæ sint in materiâ con-
tingente, tunc falsa potest esse universalis
vel subalternans, & vera particularis vel
subalternata, non tamen econtrà vera potest
esse universalis, & falsa particularis. Unde
falsa est hæc universalis: *omnis homo est doctus,*
& vera est hæc particularis: *aliquis homo est*
doctus, non tamen fieri potest, ut vera sit hæc:
omnis homo est doctus, & falsa hæc: aliquis
homo est doctus.

Ratio data est N. 9. quia ad falsitatem

propositionis universalis sufficit falsitas unius particularis, licet alia particularis sit vera, sed ad veritatem propositionis universalis, requiritur veritas omnium particularium.

ARTICULUS SECUNDUS.

De Äquipollentia.

13 CONCLUSIO: Äquipollentia est convenientia duarum propositionum alias oppositarum, proveniens ex particula non, diversis signis addita,

Explicatur definitio: dicitur primò: Convenientia duarum propositionum, quæ particulæ ponuntur pro genere, per easque äquipollentia convenit cum synonymâ propositionum, v. g. *Tullius est Orator, Cicero est Orator.*

Dicitur 2dò. Alias oppositarum, &c. Quæ particulæ habent locum differentiæ, per äquipollentiam enim duæ propositiones inter se pugnantes ita conciliantur, ut referant eundem sensum, eandem significacionem, quantitatem & qualitatem, quod sit beneficio particulæ non, quæ signo logico afficienti subjectum, tūm antē, tūm postponitur, v. g. *aliquis homo non est albus, non omnis homo est albus.* Pro claritate.

14 Advertendum imò, Ut particula non fa-

faciat propositiones æquipollentes, utrobi-
que sumi debet neganter, non infinitanter,
quapropter minimè debet afficere ipsum
subjectum, sed signum subjecto appositum,
& si particula non bis repeti debeat, semel
ponenda est ante signum, & semel imme-
diatè ante copulam.

2dò. Signa, quibus dicta particula addi- 15
tur: ad faciendam æquipollentiam, debent
esse vel ambo universalia, ut in contrariis,
vel unum universale, & alterum particula-
re, ut in contradictoriis & subalternis, cæ-
terum, si utraque propositio opposita pe-
nes se habeat signum particulare, ut in sub-
contrariis, æquipollentia fieri non potest,
ut patebit infra N. 20.

Tertiò, Signorum æquipollentiam ex 16.
his facile capies; Ly non præpositum signo-
facit illud æquivale re suo contradicto-
rio, ut: non omnis, idem est ac ali-
quis non. Signo universal i postpositum fa-
cit illud æquivale re suo contrario, ut: omnis
non, idem est ac nullus, signo & ante & post-
positum facit illud æquivale re suo subal-
terno, ut: non aliquis non, idem est ac
omnis.

Ratio horum est, quia negatio non cum
sit malignantis naturæ, destruit, quidquid
post se invenit, ergo in modo, præfixa signo
uni-

universalis affirmativo, facit illud particulae negativum. 2^{do}, praefixa signo universalis negativo facit illud particulare affirmativum. 3^{to}, praefixa signo particulari affirmativo facit illud universale negativum. 4^{to}, praefixa signo particulari negativo, facit illud universale affirmativum. Si vero postponatur signo, relinquit quidem ejus universalitatem & particularitatem, quia non destruit, nisi quod post se invenit, destruit tamen affirmationem vel negationem signi, cum alterutram censeatur post se invenire, hoc ipso, quo post se habet copulam, cui convenit affirmare vel negare, unde capies æquivalentiam signorum sequentem.

Omnis, Nullus non, Non aliquis non.

Nullus, Omnis non, Non aliquis.

Aliquis, Nonnullus, Non omnis non.

Aliquis non, Non omnis, Nonnullus non.

17 Quæres, Quot dentur Regulæ æquipollentiæ,

R. Tres, comprehensæ hoc vulgari verbu: *Præ, Contradic: post Contrà: præ póstque Subalter:*

Regula ima pro Contradictoriis indicatur per ly: *Præ Contradic:* & ita sonat, ut duæ propositiones contradictoriæ fiant æquipollentes, particula non præponi debet signo sub-

subjecti sive in 1mā sive in 2dā propositio-
ne, v. g. hæ sunt Contradictoriæ : *omnis
homo est animal*, *aliquis homo non est animal*,
primam propositionem facies æquipollen-
tem secundæ, dicendo : *non omnis homo est
animal*, & secundam facies æquipollentem
1mæ dicendo : *non aliquis homo non est
animal*.

Regula 2da pro Contrariis indicatur per 18
ly : Post Contra; & ità sonat : ut duæ propo-
sitiones contrariæ fiant æquipollentes, po-
nenda est negatio post subjectum & imme-
diatè ante copulam alterutrius propositionis,
v. g. hæ sunt Contrariæ : *omnis homo est
animal*, *nullus homo est animal*, primam fa-
cies æquipollentem secundæ, dicendo : *omnis
homo non est animal*, & secundam facies
æquipollentem primæ, dicendo : *nullus homo
non est animal*.

Regula 3ta pro Subalternis indicatur per 19
ly : Præ postque Subalter. & ità sonat, ut duæ
propositiones subalternæ fiant æquipollen-
tes, subjecto utriuslibet propositionis præ-
poni & postponi debet ly non v. g. hæ sunt
Subalternæ : *omnis homo est animal*, *aliquis
homo est animal*, 1mam facies æquipollen-
tem 2dæ, dicendo : *non omnis homo non est
animal*, secundam facies æquipollentem 1mæ
dicendo : *non aliquis homo non est animal*.

Regu-

20 Regula pro Subcontrariis nulla datur, cùm illæ non possint fieri æquipollentes, quocunque modo tractentur, ut supra dictum est. Sit exemplum: Hæ sunt duæ subcontrariæ: *Aliquis homo est animal*, *aliquis homo non est animal*. Si primæ anteponas negationem, dicendo: *Non aliquis homo est animal*, æquipollebit suæ contradictoriæ: *Nullus homo est animal*. Si postponas negationem, dicendo: *Aliquis homo non est animal*, tunc non æquipollebit suæ subcontrariæ, sed est eadem ipsa. Si ante- & postponas negationem, dicendo: *Non aliquis homo non est animal*, æquipollebit suæ subalternanti: *Omnis homo est animal*.

21 Dubitabis. Quomodo subalternata negativa, v. g. *Aliquis homo non est albus*, fiat æquipollens subalternanti: *Nullus homo est albus*. Et ratio dubitandi est, quia secundum Regulam 3tiam debet subiecto subalternatæ præ- & postponi negatio, adeoque vel per tres negationes dicendum est: *Non aliquis homo non non est albus*, quod ineptum viderur, vel deberet dici: *Non aliquis homo non est non albus*, & hoc esset impertinens, cùm ly *non* possum post copulam afficiat terminum, adeoque sumatur *infinitanter*; unde dicta propositione non æquipolleret suæ subalternanti, sed contradictrioriæ, quia Spec.

Specatis duabus negationibus faceret hunc sensum: *Omnis homo est albus.*

R. Aequipollentia subalternatæ negativæ propter obscuritatem suam vix locum habet, insistendo tamen Regulæ triæ dicendum foret: *Non aliquis homo non non est albus*, qui modus non omnibus Dialecticis improbat. Posset tamen evitari multiplicatio negationis, *1mō*, si hoc signum: *Non aliquis non*, mutaretur in aequipollens: *Omnis*, & unica negatio præponeretur copulæ, dicendo: *Omnis homo non est albus*, & hoc modo aequipolleret subalternanti: *Nullus homo est albus*, quia *omnis non*, est *nullus*. *2dō*, si una tantum negatio præponeretur roti propositioni, dicendo: *Non aliquis homo est albus*, & sic iterum aequipolleret subalternanti, quia *non aliquis est nullus*.

ARTICULUS TERTIUS.

De Conversione.

CONCLUSIO I. *Conversio est Trans-*²²
mutatio unius extremi totalis in alterum
extremum totale, manente eadem qualitate
& veritate.

Explicatur. Ad hoc ut fiat legitima conversio, requiritur *1mō*, ut totum prædicatum

catum propositionis conversæ , vel quæ convertitur , fiat subjectum propositionis convertentis , vel in quam sit conversio , sed signum logicum stare debet à principio utriusque propositionis , NB. dummodo subjectum sit illius capax , ut : Nullus homo est equus , nullus equus est homo.

Dictum est NB. Dummodo subjectum sit capax signi logici , si enim convertere velis hanc propositionem : Nullum brutum est Petrus , non dices : Nullus Petrus est brutum , sed : Petrus non est brutum.

Requiritur 2dō , ut maneat perfectè iudicium termini , tam quoad significationem , quam quoad proprietates . Unde non valet hæc conversio : Ceci vident , videntes sunt ceci . Suppositio tamen proveniens à signis , in conversione per accidens , mutari debet , ut patebit infrà .

Requiritur 3tō , ut ambæ propositiones , tam conversa , quam convertens , sint affirmativæ , vel ambæ negativæ , ut : Omnis homo est animal , aliquid animal est homo .

Requiritur 4tō , ut , si propositio conversa sit vera , etiam convertens sit vera , non tamen opus est , ut , conversâ falsâ , etiam convertens sit falsâ . Ratio disparitatis est , quia conversio legitima est formalis consequentia propositionis convertentis

tentis ex propositione conversâ, ex vero autem nunquam sequi potest falsum, sed ex falso per accidens sequi potest verum, ut in P. 3. tradetur, unde hæc est bona conversio: *omnīshomo est albus, aliquod album est homo*, & tamen ita propositio falsa est, & secunda vera. Ut conversio ex quā maximè pendet ars syllogismorum, melius intelligatur:

Advertendum 1mō, quod accurate ob- 23 servari debeat prædicatum propositionis, & si hoc ponatur implicitè, propositio priùs resolvenda sit, quam convertenda, v. g. si converti debeat hæc propositio: *Sacerdos est in Ecclesiâ*; noli convertere sic: *Ecclesia est in Sacerdote*, sed priùs resolve propositio- nem: *Sacerdos est existens in Ecclesiâ*, & tum converte: *aliquod existens in Ecclesia est Sa- cerdos*. Quod idem observandum est in verbis impersonalibus, ut: *hominem pænitit peccati*, priùs resolve: *homo est pænitens peccati*, & converte: *pænitens peccati est homo*.

2dō. Si verbum propositionis conver- 24 tendat sit in futuro, tæpè resolvenda est in participium ejusdem temporis, quod cum prædicato ejus propositionis ponendum est pro subjecto convertentis, interponendo copulam de præsenti, v. g. hæc proposi-

110: *nullus Sacerdos erit Laicus, malè converteretur sic: nullus Laicus erit Sacerdos, ante igitur resolvenda est propositio hoc modo: nullus Sacerdos est futurus Laicus, & jam convertitur. nullus futurus Laicus est Sacerdos.*

25 3^{to}. Si Copula sit de præterito, v. g. *nullus puer fuit senex, tunc vel finge partici- pium fuitus, & dic: nullus fuitus senex est puer, velejus loco utere particulâ olim, ut: nullus olim senex est puer, vel explica copu- lam per relativum, sic: nullus, qui fuit senex, est puer, vel ly fuit senex, sic ex- prime: est ingressus senectutem: & ita con- verte: nullus ingressus senectutem est puer.*

26 4^{to}. In propositionibus exclusivis, sive in quibus subintelligitur vocula exclusiva tantum, prius hæc particula propositioni convertendæ addidebet, ut bona conver- sio fieri possit, v. g. *nullus Baccalaureus est Magister, ut secundum Regulas converti possit, dicendum prius est: nullus tantum Baccalaureus est Magister, & cum converti- tur: nullus Magister est tantum Baccalaureus.*

27 CONCLUSIO II. Conversio triplex est, *Conversio Simplex, Conversio per Acci- dens & Conversio per Contrapositionem.*

Declaratur: *Conversio Simplex fit, quando subjectum mutatur in prædicatum, & præ-*

& prædicatum in subjectum, ita ut maneat in
utrâque propositione eadem quantitas, id
est, universalitas vel particularitas, & ea-
dem qualitas, id est: affirmatio vel negatio,
ut: nullus homo est brutum, nullum brutum
est homo.

Conversio per Accidens fit, quando sic
transmutatio extremorum, ita ut maneat
eadem qua'itas, mutetur tamen quantitas,
ut: omnis homo est animal, aliquod animal
est homo.

Conversio per Contrapositionem fit;
quando extrema ex terminis finitis, per ap-
positam particulam non, fiunt infiniti, & tum
transponuntur, manente eâdem quantitate &
qualitate, ut: omnis homo est rationalis, om-
ne non rationale est non homo, sed hujus con-
versionis per contrapositionem rarius est
utus, tum, quia obscurior est, quam
ipsa propositio cuius explicandæ gratiâ adhi-
betur, Tum, quia non servit ad reductionem
syllogisticam, cuius gratiâ conversio maximè
inventa est. Tum denique, quia in conver-
sione per contrapositionem, non tantum
transmutatur prædicatum in subjectum, &
subjectum in prædicatum, sed termini planè
mutantur, ex finitis in infinitos,

Quæres, Quænam propositiones conver. 28

tantur simpliciter, quænam per accidens,
& quænam per contrapositionem?

R. Conversio propositionum dignoscenda est ex sequente versu,
EccE, tibi, simp: ArmI; gEtOs, acc:
ArmA, bOnO, con:

Ubi notandæ sunt vocales A, E, I, O, per
quas designatur propositionum universalitas
vel particularitas, affirmatio vel negatio,
hoc ordine: A indicat propositionem uni-
versalem affirmativam. E universalem ne-
gativam. I. particularem affirmativam.
O particularem negativam, quodiplum do-
cent sequentes versus:

Afferit A, negat E, sed universaliter ambe,
Afferit I, negat O, sed particulariter ambo.

Præcedens igitur versus apperit conver-
sionem propositionum modo sequente:

29 1mò. EccE: Propositio universalis nega-
tiva convertitur (simp:) simpliciter in pro-
positionem univertalem negativam, Ut:
nullus leo est equus, nullus equus est leo.

2dò. tibi: Propositio particularis affir-
mativa convertitur simpliciter in particula-
rem affirmativam, ut: aliquod animal est ra-
tionale: aliquod rationale est animal.

3uò. ArmI: Propositio universalis affir-
mativa convertitur (acc:) per accidens in
particulariem affirmativam, ut: Omnis homo
est sensitivus, aliquod sensitivum est homo.

4tò, gEroS: Propositio universalis negativa convertitur per accidens in particularem negativam, ut: *nullus homo est latrabilis, aliquid latrabile non est homo.*

5tò Arma: Propositio universalis affirmativa convertitur (*Con:*) per contrapositionem in universalem affirmativam, ut: *Omnis homo est vivens, omne non-vivens est non homo.*

6 dō bono: Propositio particularis negativa convertitur per contrapositionem in particularem negativam, ut: *aliquis homo non est albus, aliquid non-albus non est non-homo.*

Habes igitur, quod propositioni universalis affirmativa conueniat modus converendi duplex, per accidens & per contrapositionem. Propositioni particulari affirmativa, unus: *simpliciter.* Propositioni universalis negativa, duplex: *simpliciter & per accidens.* Propositioni particulari negativa, unus: *per contrapositionem.*

Dices. Propositio universalis affirmativa, etiam potest converti simpliciter, ergo non tantum per accidens & contrapositionem. P. ant. Hæc est propositio universalis affirmativa, *omnis homo est rationalis*, sed illa potest converti simpliciter, dicendo: *Omne rationale est homo*, ergo.

R. D. ant. Propositio universalis affirmativa e iam potest converti simpliciter conversione materialiter bona C. ant. Conversione formaliter bona N. ant.

31 Conversio potest esse tripliciter bona,
1mo: materialiter tantum (quæ est conversio tantum apparenter talis) quando in materia vel ob necessariam connexionem terminorum utræque propositio habet debitum sensum, regulæ tamen conversionis non servantur (ut contingit in objecto exemplo) adeo que conversio non est formaliter bona.
2dò. Conversio est bona formaliter tantum, quando in materia falsa servantur regulæ conversionis, ut: nullus homo est rationalis, nullum rationale est homo. 3dò. Conversio est bona materialiter & formaliter simul, quando in materia vera regulæ conversionis debite applicantur, ut: Omnis homo est rationalis, aliquid rationale est homo. v. etiam de Nat. Argum. N. 6.

32 Dubitabis. Quomodo convertantur propositiones singulares.

R 1mo. Si propositionis singularis, & subjectum & prædicatum sint termini singulares, convertitur simpliciter, sive sit affirmativa, sive negativa, ut: Cicero est hic Orator, hic Orator est Cicero, Aristoteles non est Virgilius, Virgilius non est Aristoteles.

R. 2d

R. 2dō. Si subiectum sit terminus singu-
latis, prædicatum sit terminus communis,
propositio singularis convertitur per acci-
dens, & quidem affirmativa in particularem,
negativa in universalem. Exemplum prioris
est: Petrus est Logicus, aliquis Logicus est Pe-
trus. Exemplum posterioris est: Petrus non
est brutum, nullum brutum est Petrus.

PARS TERTIA.

DE

*Pertinentibus ad Discursum vel
Argumentationem.*

INFORMATIO PRIMA.

De Argumentatione & ejus speciebus.

ARTICULUS PRIMUS.

De Natura Argumentationis.

CONCLUSIO. Argumentatio est Ora-
tio explicans illationem unius ex alio.

Explicatur: Dicitur 1mō: Oratio (& qui-
dem perfecta) quæ particula est genus ad de-
finitionem, divisionem, propositionem.

Dicitur 2dō: Explicans illationem unius ex
alio, & hæ particulæ obtinent rationem dif-
ferentiaz, & sic intelligendz sunt: Argu-